

lis Gnovis

■ **PIELUNC.** Su lis olms di Charles Barker

Rivât in Friûl par visitâ i puecscj là che so nono Charles Barker al operà, vie pal 1944, come radioperadôr dal Servizi segret britanic «Soe», il zovin australian Matthew Tocherman al à stât compagnât li dal cjistiel di Pielunc dal responsabil de biblioteche «Movm Renato Del Din», Jurij Cozianin, e dal sindic di Clausêt, Flavio Del Missier. Te abitance dal cont Ceconci, là ch'al jere logât il comand de «Brigata Osoppo», Tocherman (ch'al lavore a New York) al à podût scontrâ Antonio Manfroi, fi dal militâr neozelandês Harold Sanderson («Ingl»), e Maurizio Corrado, fi dal partesan «Amy», par rivocâ la rivade di Barker tal Cjanâl dal Arzin, dopo di jessi stât paracadutât a Pradis, te gnot dai 18 di Lui. Il radioperadôr al operà ancje in Cjargne e tal Cjadovri, prin di jessi caturât tal Cjanâl di San Canzian, tal mês di Otubar dal '44. Depuartât tal Stalag austriac XVII A di Kaisersteinbruch, al rivà adore di fuî tal mês di Avrîl dal '45.

■ **PUART.** L'art de Fische

A laran indevant fintremai ai 3 di Lui, li dal Palaç dal Vescul (te strade dal 'Seminari) i percors fra art e science «L'arte della Fisica, di Luigi Russolo a Renzo Bergamo». L'iniziativa, curade di Roberta Semeraro, e je stade screade tal mês di Març. I visitadôrs a son inviadôs di martars fin joibe (14.30-18.30); di vinars (14.30-19.30) e di sabide e di domenie (10-19). Par grops e scuelis si po prenotâ visitis guidadis straordenariis di matine e di lunis (www.lartedelafisica.it – info@palazzovescovile.it).

■ **FLORENCE.** Omaç a Pasolini

Cu lis proiezioni dai cines «Uccellacci e uccellini» dal 1966 (ai 30 di Mai), di «Il fiore delle mille e una notte» dal 1974 (ai 7 di Jugn) e «Salò o le 120 giornate di Sodoma» dal 1975 (ai 9 di Jugn), e rive insom la rassegna «Pasolini 100», inmaneade a Florence, vie pai mês di Març, di Avrîl, di Mai e di Jugn par onorâ il centenari di Pieri Pauli Pasolini (1922-1975). La retrospetive, curade di «Gabinetto Vieusseux e dai cines «La Compagnia» e «Stensen», cul jutori de Cineteche di Bologne, e à presentât 13 titui de cinematografie dal inteletuâl di Cjasarse.

■ **TRIEST.** Cuintri de mafie

L'Osservatori regionâl cuintri de mafie al à ideât e al curarà il concurs par assegnâur 3 premis ai students des Universitâts dal Friûl e di Triest ch'a varan prontât lis miôr tesis su la promoziun de culture de legalitât e pe cognossince da la criminalitât organizade mafiose. Lis domandis di partecipazion a varan di jessi consegnadis dentri dai 5 di Setembar, seont il regolament publicât tal «Bur» e tai lûcs internet dal Consei regionâl e dal Osservatori. I premis a saran di 2 mil euros pes tesis magjistrâls e di mil euros pes tesis di laureade trienâl.

■ **UNTERFÖHRING.** Art d'azion e d'inclusion

In zornade di vuê, e je imbastide li dal Centri culturâl dal Cumon bavârês di Unterföhring, tai contors di Munic, la mostre «L'anima, la terra, il colore. Arte d'azione e di inclusion», ch'è proferis uns 90 oparis dal pitôr Toni Zanussi, dividudis in 5 sezions. Prin di rivâ in Baviere, la rassegna itinerante e je stade esponude a Triest, cul jutori di «Enaip» e de clape pal inseriment sociâl dai ex presonîrs «Icaro». Al artist furlan i à dedicât un servizi ancje il setemanâl «BuoneNotizie L'impresa del Bene» dal «Corriere della Sera».

Mercus 25 La Madone di Monsante

Joibe 26 S. Filip neri

Vinars 27 S. Agostin di Canterbury

Sabide 28 S. Emili martar

Domenie 29

Lunis 30 S. te Zuane d'Arc

Martars 31 Visitazion de S. Vergjine

Il timp Timp variabil

La Sense



Il soreli
Ai 25 al jeve aes 5.25
e al va a mont aes 20.44.



La lune
Ai 30 Lune gnove.

Il proverbi
Aghe passade no masane plui.

Lis voris dal mês

Tal zardin movêt la tiere, taiait vie lis rosis flapidis e semenait malve e calendule. O podês semenâ ancje i flôrs autunâi.

Concorence disleâl

A patrâs il principi costituzionâl da la sussidiarietât

A là durât 8 minûts il Consei dai ministrs straordenari, convocât di Mario Draghi ai 19 di Mai. Vot minûts par otigni di ducj i ministrs l'impegn a velocizâ l'iter dal Dissen di leç «Concorence», par rivâ a fâlû aprovâ dentri dal mês di Mai, e la permission di domandâ la fiducie dal Parlament, tal cês che la maiorance e tomàs a dopâ. Par Draghi, l'aprovazion dal «Ddl» e je necessarie par «rispietâ i tims dal Plan pe riprese e pe resilience». Pai mieçs di comunicazion talians, il pont critic (ch'al fâs triculâ la maiorance e ch'al varès di tirâ dute l'atenzion de opinion publiche) a son dome indenizazion, scjadincis e durade des «Concessions balneârs». Ma ise propit vere? Fûr par fûr contrari al è il judizi di ch'è part de Societât civil ch'è a tal cûr la protezion e la valorizazion dai Bens comugnâi. «Il Ddl al è un manifest ideologic che, ripetint la solfe "inressite, competitivât, concorence", al brame une butade gnove di privatizacions dai Bens comugnâi, da l'aghe a l'energjie, des scovacis al traspuart public locâl, de sanitât ai servizis sociâi e culturâi», al denunzie l'apel dal «Forum talian dai Moviments pe aghe» (www.acquabenecomune.org/notizie/nazionali/4209-appello-per-una-campagna-comune-fermare-il-dll-concorrenza-difendere-acqua-beni-comuni-diritti-e-democrazia), rivoçât ancje di Emilia Accomando, puartevoç de seziun udinese dal Comitât «Stop Ttip» (https://www.facebook.com/comitatoSTOPTTIPudine/about/?ref=page_internal), ch'è a strucât la posizion dai oposidôrs plui critics tal document «Non c'è pace per l'acqua pubblica, col rischio di sacrificarla sull'altare dei profitti». La linie dai guvieris neoliberscj e je simpri compagne – e scrif Accomando – e il «Ddl Concorence» al è pardabon alarmant, «pal fat ch'al invie lis privatizacions cence nissun slaif, ancje lant cuintri di ponts precis de nestre Costituzion, quant che impen al sarès necessari di tomâ a proponi un model sociâl e politic inlidrisât te curie e te difese dai Bens comugnâi e da l'aghe e su l'aministra-



Il cantir dal acuedot «Molino del Bosso-Giavons» a Cjamp Garzulin, daprûf Buje, dal 1954 (www.cafcspa.com)

Seont il «Forum talian dai Moviments pe aghe», il «Ddl Concorence» dal Guvier al dispropie lis Comunitâts dai Bens comugnâi, dai dirits e de democrazie

zion partecipade dai Bens publics, evitant che i Cumons a sedin dispossessâts dai siei compits. I citadins a àn za provât ce ch'al vûl di privatizâ i Bens comugnâi e i servizis publics – e bat la puartevoç dal Comitât udinês «Stop Ttip» –: «nissune curie des risorsis naturâls; peiorament cuantitativ e cualitativ dal serviz; inressite esponenzial des boletis; fin di ogni control democratic su la gjestion». Ma lis privatizacions – e zonte Emilia Accomando – a «peiorin ancje i dirits dai lavoradôrs, ridusint ocupazion e mesadis e inressint sfrutament e precarietà». Figurâsi, po, s'al ves di jessi adotât il principi de «finanziarizazion des risorsis naturâls», cui «Nac» («Natural Asset Company»).

Mario Zili

Par une gjestion condividue e publiche de aghe

Il Ben comugnâl Aghe al è un catalizadôr par recuperâ e par infuarti la cussience di jessi Comunitât e la cussience di jessi Comunitât e je la fonde par une gjestion autonome, positive e responsabil dal Ben Aghe. Franceschino Barazzutti, president dal Comitât «Tutela delle Acque del Bacino montano del Tagliamento», nol mole di bati e di tornâ a bati il plui naturâl dai principis, ch'al è ancje il struc dal so ultin intervent public, popolarizât cul titul «Montagna: Acqua e Comunità». Dai 15 di Mai, si po leilu tal lûc internet «Non solo Carnia» (www.nonsolocarnia.info/franceschino-barazzutti-montagna-acqua-e-comunita/).



Messe in marilenghe

A Udin, la Messe par furlan e ven cjantade ogni sabide, a 5 e mieze soretere (17.30), li de capele de «Puritât», daprûf dal domo. Sabide ai 28 di Mai al cjarantà messe pre D. Volpe. Radio Spazio e trasmet sul moment, ogni setemane, dute la celebrazion.

Tradizions furlanis dal mês

par cure di Mario Martinis

LA SENSE

Cuarante dis dopo Pasche (che e pues colâ jenfri il 22 di Març e il 25 di Avrîl par vie de sô date mobil), la Glesie e ricuarde cun solenitât la Sense di Jesù al cil. Sigheduncje, secont il calendari eclesiastic la Sense e cole jenfri il Prin di Mai e il 4 di Jugn e cul gnûf calendari liturgjic e ven sistemade inte seste domenie dopo la Pasche. Ancjemò une volte la simbologjie liturgjiche e ven a coincidi in maniere straordenarie cui ritmis de nature, tant che la jevade di dutis lis fuarcis gjerminativis, che in ceste fase de primevere si cjate te sô colme, e corispuint ae assension di Crist in cil.

In Crist assendent, la religiositât populâr e viodeve il simbul di ogni energjie terene, tant che in chel di sacri la int si astignive dal cjapâ sù rosis, frascjis e ortais par no corompi la energjie gjerminative de nature inte ponte da so disvilup. In plui, secont la superstizion dal popul, la aghe esponude fûr a viert te gnot de Sense e cjapave virtûts miracolosis no diviersis di chês



supadis te gnot magjiche di Sant Zuan. Cun di plui, il di de Sense al jere marcadôr di pronostic atmosferic, cussi se al ploveve in chel di al varès plot par 40 dis.

La crodince populâr de societât agrarie e slargjave ae fieste de Sense cuasi la stesse straordenarie sacralitât riservade al Nadâl e ae Pasche, propit parcè che ancje jê e marcave un colegament diret jenfri cil e tiere, un rapuart verticâl, spirituâl e cosmic. Fintremai tai agns Setuale del Nûfcen ancje in Friûl, tal lunis, martars e miercus prime de Sense (che e colave di joibe) si tignive la seconde rogazion che, passe la consacrazion de nature e des coltivazions peade al mont agrari e ai siei simbul, e veve la funzion sociâl di conferme de jurisdizion dal

teritori eclesiastic.

Lu dimoste ancjemò vuê la suggestive cerimonie de «Bussade des Crôs» de Plêf di Zui, dulà che si dan cunvigne liturgjiche dutis lis crôs des glesiis cjargnelis ator di ch'è de plêf mari di Sant Pieri.